

RELATÓRIU KONSULTA PÚBLIKA

Política no Planu Asaun kona-ba Promosaun Ekonomia Tasi ne'ebé Reziliente no Sustentável iha Timor-Leste [2025–2035]

Setembru-outubru 2025



Gabinete Fronteiras Terrestres no Marítimas
Governo República Demokrátika Timor-Leste



Agradesimentus husi Gabinete Fronteiras Terrestres no Marítimas

Gabinete Fronteiras Terrestres no Marítimas (GFTM) liuhusi biban ida-ne'e, mai agradese ba ema hotu-hotu ne'ebé kontribui ona ba susesu Konsulta Pública kona-ba Política ho Planu Asaun Ekonomia Azúl [2025–2035]. Prosesu ne'e hanesan hakat boot ida iha konstrusaun futuru ida ne'ebé azúl, sustentável no próspere ba Timor-Leste.

Kontributus online

Ba ema sira ne'ebé partisipa ona iha faze online, entre 11 no 30 setembru 2025, GFTM hato'o ho laran tomak nia agradesimentu. Kontribuisaun husi sociedade sivil, husi parseirus desenvolvimento, setór privadu, husi organizasoens naun-governamentais (ONGs) no husi academia aumenta profundidade técnica ho propostas práticas ne'ebé sei hariku versaun final husi Política ho Planu Asaun.

Partisipantes prezensiais

Ami rejista liuliu mak partisipasaun husi serkade 700 representantes husi território nasional tomak, inklui Xefes Suku, Administradores Postus Administrativus ho Prezidentes Autoridades Municipais (PAM), no mós altus membrus Governu, iha sesaun 21 outubru iha Ministériu Finanzas. Kompromisu boot ho intervensaun sira ne'ebé di'ak tebetebes iha sesoens perguntas ho respostas hatudu katak Ekonomia Azúl hanesan prioridade nasional, ne'ebé forja (ka elabora didi'ak) liuhusi diálogo inkluzivu no ba sidadaun sira hotu.

Rekoñesimentu institusionál espesial ida ba Ministériu Administrasaun Estatal no ba pontu fokál ministerial sira, ba sira nia papél dezizivu iha mobilizasaun ho koordinasaun nasional. Bele destaka mós 187 kontributus eskritos ne'ebé simu ona, fundamentais tebes hodi transforma preokupasoens lokais iha solusoens konkretas.

Primeiru-Ministru

Agradesimentu espesial ne'e hato'o ba Sua Exelênsia Primeiru-Ministru, Kay Rala Xanana Gusmão, ba lideransa vizionária ne'ebé hatudu bainhira prezide sesaun prezensial iha 21 outubru 2025. Nia mensajens iha abertura ho enserramentu reforsa vizaun kona-ba Ekonomia Azúl hanesan motór estratégiku kreximentu ho desenvolvimento ba país.

Prosesu ne'e hatudu katak, bainhira, Governu ho sociedade servisu hamutuk, bele transforma potencial iha oportunidades reais. Ho imi hotu nia kontributu, Timor-Leste preparadu liután atu konkretiza vizaun **BTimor- Leste Azúl, Reziliente no Prósperu.**

Gabinete Fronteiras Terrestres no Marítimas Dili,
Timor-Leste, 12 dezembru 2025

Índice

| | |
|---|-----------|
| 1. Introdusaun | 4 |
| 2. Metodolojia ho Partisipasaun | 7 |
| 3. Konsulta online (11 to'o 30 setembru 2025) | 8 |
| 4. Konsulta prezensiál (21 outubru 2025) | 10 |
| <ul style="list-style-type: none">• Diskursu Abertura hato'o husi Sua Exelénsia Primeiru-Ministru Kay Rala Xanana Gusmão• Apresentasaun Polítika ho Planu Asaun kona-ba Promosaun Ekonomia Tasi ne'ebé Reziliente no Sustentável iha Timor-Leste [2025-2035]• Sesaun Perguntas ho Respostas• Rekomendasoens• Diskursu Enserramentu | |
| 5. Konkluzau | 17 |
| 6. Aneksus | 18 |
| <ul style="list-style-type: none">• Dokumentu sira ne'ebé disponibiliza iha Konsulta Públika online ho Konsulta Prezensiál 21 outubru 2025• Ajenda Konsulta Públika kona-ba Polítika no Planu Asaun ba Ekonomia Azúl ho Autoridades Munisipais no Líderes Komunitáriu• Formuláriu partisipasaun (Formuláriu Partisipasaun Konsulta Públika)• Sumáriu Ezekutivu: Polítika no Planu Asaun kona-ba Promosaun Ekonomia Tasi ne'ebé Reziliente no Sustentável iha Timor-Leste [2025-2035] | |

1

INTRODUSAUN



Iha 25 juñu 2025, Konsellu Ministrus Timor-Leste aprova ona, ein-prinsipiu, Política ho Planu Asaun kona-ba Promosaun Ekonomia Tasi ne'ebé Reziliente no Sustentável [2025-2035]. Desizaun ne'e hatudu kompromisu IX Governu Konstitusionál nian atu promove modelu inovadór no integradu dezenvolvimentu ekonómiku nian ida ne'ebé bele asegura utilizaun sustentável rekursus mariñus, melloria kondisoens moris populasoens kosteiras (katak, besik tasi-ibun), ho protesaun ekosistemas mariñus.

Atu garante katak política ne'e reflète nesidades ho aspirasoens setór sosiedade sira, mak realiza prosesu konsulta pública boot ida. Prosesu ne'e envolve partisipasaun husi sosiedade sivil, parseirus dezenvolvimentu, setór privadu, organizasoens naun governamentaisis, akademia no, tuir fali mai, autoridades munispais ho komunidadades lokais, hodi fortalese representatividade territorial no sosiál iha formulasaun no aperfeisoamentu dokumentu.

Iha demokrasiá, konsulta pública hanesan instrumentu esensial ida ne'ebé permite sidadaun sira hato'o sira-nia opiniaun ba Governu kona-ba matéria ka desizaun balu, ne'ebé bele possibilíta sira-nia partisipasaun ativa iha konstrusaun politikas públicas no iha jestaun país nian rasik.

Konsulta pública kona-ba Política ho Planu Asaun Ekonomia Azúl Timor-Leste nian hala'o ho formatu kombinadu: online ho prezensial.

Komponente online hala'o entre 11 no 30 setembru 2025, ne'ebé hetan partisipasaun pública boot ho haruka mós kontributus kona-ba política estratéjika ne'e.



Iha dia 21 outubro 2025, realiza sesaun prezensial ida iha Ministériu Finansas, iha Díli, ne'ebé konta ho prezensa husi serkade 700 partisipantes, inklui autoridades munispais ho líderes komunitários. Entre sira ne'ebé presentes, bele destaka Prezidentes Autoridades Munispais, responsáveis Postus Administrativus, Xefes Suku no representantes ministérius relevantes. Iha sesaun ne'e, apresenta prioridades ho objetivus política nian. Tuir fali mak sesoens diálogo no rekolla kontributus, ho hanoin atu asegura inkluzau efetiva husi parte interesada sira.

Portantu, konsulta pública ne'e hanesan momentu krusiál ida atu garante transparénsia, inkluziun ho representatividade sosiál iha konstrusaun modelu governasaun oseau nian ida ne'ebé bele responde ba dezafius ambientais no promove dezvoltimentu ekitativu.

Abordajen kombinada husi konsulta pública (online no prezensiál) ne'e, reflète kompromisu Governu atu garante prosesu ida ne'ebé partisipativu, transparente no inkluzivu ba formulasaun no implementasaun Ekonomia Azúl, ne'ebé loka espasu atu diferentes vozes (ka, lian sira ne'ebé la hanesan) ita bele rona no integra iha konstrusaun futuru ida ne'ebé sustentável ba Timor-Leste.



Kronograma Política ho Planu Asaun kona-ba Promosaun Ekonomia Tasi ne'ebé Reziliente no Sustentável iha Timor-Leste [2025-2035]

2023 – Nota konseptuál kona-ba Política Ekonomia Azúl

Inísiu 2024 to'o juñu 2025 - Dezenvolvimentu dokumentu Política ho Planu Asaun kona-ba Promosaun Ekonomia Tasi ne'ebé Reziliente no Sustentável iha Timor-Leste [2025-2035], husi ekipa téknika.

14 maiu 2025 – Apresentasaun 1ª parte Política ho Planu Asaun kona-ba Promosaun Ekonomia Tasi ne'ebé reziliente no Sustentável iha Timor-Leste [2025-2035] ne'ebé engloba konseitu, misaun, vizaun iha Konsellu Ministrus.

25 juñu 2025 - Aprovasaun ein-prinsípiu Política ho Planu Asaun kona-ba Promosaun Ekonomia Tasi ne'ebé Reziliente no Sustentável iha Timor-Leste [2025-2035], husi Konsellu Ministrus.

11 setembru to'o 30 setembru 2025 - Realizasaun primeira faze konsulta pública online atu rekolla kontributus husi sosiedade sivil, setór privadu, parseirus dezenvolvimentu, akademia ho interesadu sira-seluk.

21 outubru 2025 - Konsulta pública prezensial iha Díli, ho partisipasaun husi autoridades munisipais ho líderes komunitários.

Outubru to'o dezembru 2025 - Análize kontributu sira ne'ebé simu ho revizaun dokumentu *Política ho Planu Asaun kona-ba Promosaun Ekonomia Tasi ne'ebé Reziliente* no Sustentável iha Timor-Leste [2025-2035].

Janeiru 2026 - Aprovasaun final *Política ho Planu Asaun kona-ba Promosaun Ekonomia Tasi ne'ebé Reziliente no Sustentável iha Timor-Leste [2025-2035]*, iha Konsellu Ministrus.

Fevereiru 2026 - Impresan ho publikasaun *Política ho Planu Asaun kona-ba Promosaun Ekonomia Tasi ne'ebé Reziliente no Sustentável iha Timor-Leste [2025-2035]*.

Finais fevereiru – Finais julu 2026 – Faze socializasaun no sensibilizasaun Política ho Planu Asaun kona-ba Promosaun Ekonomia Tasi ne'ebé Reziliente ho Sustentável iha Timor-Leste [2025-2035], iha munisípiu sira hotu, ba comunidade lokál sira, ne'ebé sei lidera husi Sua Exelénsia Primeiru-Ministru Kay Rala Xanana Gusmão.

Hahú husi primeiru trimestre to'o finais 2026 – Inísiu implementasaun medidas ho asaun sira ne'ebé relaciona ho Política ho Planu Asaun kona-ba Promosaun Ekonomia Tasi ne'ebé Reziliente no Sustentável iha Timor-Leste [2025- 2035].

2

METODOLOJIA HO PARTISIPASAUN

Prosesu konsulta pública hala'o iha faze komplementár rua: online no prezensiál, ne'ebé garante asesibilidade boot ho inkluzo un husi kontributus relevantes, inklui korresoens ho sujestoens téknikas.

- **Faze Online (11 to'o 30 setembru 2025):** Realiza liuhusi portál ofisiál <https://www.gftm.gov.tl/pt/konsulta-publica-ea/> permite haruka kontributus eskritus husi setór oioin, ne'ebé fornese inputs estratéjikus, korresoens ho sujestoens fundamentais ba aperfeisoamentu (ka, melloramentu) polítika.
- **Faze Prezensiál (21 outubru 2025):** Hala'o iha Auditóriu Kay Rala Xanana Gusmão, Ministériu Finansas, iha Díli, ho serkade 700 partisipantes, inklui membrus Governu, Prezidentes Autoridades Munisipais (PAM), Administradores Postus Administrativus no, liuliu, Xefes Suku husi territóriu nasionál tomak. Prezide husi Sua Exelénsia Primeiru-Ministru, inklui apresentasoens téknikas kona-ba Política, sesoens perguntas ho respostas no rekolla kontributus eskritus.
- **Públiku-Alvu:** Sosiedade sivil, setór privadu, parseirus dezenvolvimentu, comunidades lokais, autoridades lokais, organizasoens naun-governamentais (ONGs), ho sosiedade ein-jerál.
- **Meius Divulgasaun:** Portál Governu, redes sociais, imprensa nasionál, kontaktus institusionais ho billboards. Dokumentasaun kona-ba prosedimentu konsulta pública ne'e, disponível iha portál <https://www.gftm.gov.tl/pt/konsulta-publica-ea/>.



3

KONSULTA PÚBLIK A ONLINE

Konsulta pública online, ne'ebé realiza entre 11 no 30 setembru 2025 liuhusi portál ofisiál Gabinete Fronteiras Terrestres no Marítimas (<https://www.gftm.gov.tl/pt/konsulta-publica-ea>) hanesan inovasaun pioneira (ka,dahuluk) ida iha Timor-Leste. Simu 20 kontributus husi entidades estratéjikas, inklui sociedade sivil, parseirus dezinvolvimentu, akademia ho setór privadu. Kontributu hirak-ne'e fornese sujestoens téknikas relevantes, ho inputs fundamentais ba aperfeisoamentu política.

Prinsipais destakes:


- **ONGs:** Korál Triangle Centre, Conservation International Timor-Leste, WorldFish, Blue Ventures, HACOSTA (Center for Coastal and Marine Resources Studies), La'o Hamutuk Institute, Leonel Training Centre (LTC), Tahi Opu Foundation
- **Akademia:** Universidade Sydney, LELI (Lorosa'e English Language Institute)
- **Setór Privadu:** Caltech Group, DFBC Dili Financial Business Centre, Timor-Leste Australia Business Council
- **Parseirus Dezinvolvimentu:** World Bank Group, UNCT- United Nation Country team
- **Sociedade Sivil**



Consulta Pública Online Online Public Consultation 11 – 30 September 2025

Economia Azul: Política e Plano de Ação para a Promoção de uma Economia do Mar Resiliente e Sustentável em Timor-Leste, 2025 – 2035
Blue Economy: Policy and Action Plan to Promote a Resilient and Sustainable Economy of the Sea in Timor-Leste, 2025 – 2035

Scan QR Code



Dê a sua opinião!
Give us your feedback!

Email: consultapublica@gftm.gov.tl
Web: www.gftm.gov.tl/pt/politica-de-economia-azul/



Dezafius husi Konsulta *Online*

Primeira faze konsulta pública halo liuhusi plataforma *online*, ho objetivu atu rekolla kontributus husi instituisoens governamentais, parseirus dezenvolvimentu ho sidadauns. Prosesu ne'e atu asegura transparénsia, inkluzau ho partisipasaun boot iha definisaun kona-ba prioridades estratéjikas.

Realizasaun konsulta pública liuhusi plataforma *online* hanesan marku istóriu ida ho ezersísiu pionieru ida iha Timor-Leste. Inisiativa ne'e reflète kompromisu Governu nian atu moderniza mekanizmus governasaun no habelar partisipasaun sívika, ne'ebé permite envolvimentu ne'ebé boot no asesível liu husi populasau iha prosesu formulasau politikas públicas. Maibé, maski ho nia karáktek inovadór, faze inisial husi prosesu partisipativu ne'e hasoru konstranjimentus (ka, limitasoens) boot ne'ebé kompromete ninia efikásia ho alkansé tomak.

Prinsipais dezafius ne'ebé identifika ona, inklui:

- **Barreiras linguísticas:** Versaun iha Tétun la disponível online, limita partisipasaun imediata husi comunidade sira ne'ebé depende barak ba lian ida-ne'e.
- **Inkonsisténsias iha dadus setoriais:** Diverjénsias entre informasoens husi ministérius no parseirus dezenvolvimentu hatudu lakunas kritikas (ka, boot) iha armonizasaun ho validasaun dadus, mina (ka, estraga tiha) fiabilidade prosesu ne'e nian.
- **Kobertura territoriál insuficiente:** Alkansé (ka, kobertura) konsulta online ne'ebé limitadu, hatudu dezigualdades dijitalis ne'ebé kle'an tebes, ne'ebé marjinaliza tiha comunidade remota no vulnerável sira ne'ebé la iha asesu ba internet.
- **Kompleksidade exesiva (katak, barak demais) husi dokumentu:** Linguajen téknika densa (katak, todan no difísil) ho volume boot husi nia konteúdu difíkulta kompreensau husi parte sidadaun ho organizasaun sira ne'ebé la iha formasaun espesializada, hodi nune'e redúz tiha impaktu partisipativu ho apropriasau dokumentu (katak, bele hetan dokumentu ne'e).

4 SESAUN PREZENSIÁL



KONSULTA PÚBLIKA KONA-BA POLÍTICA NO PLANU ASAUN BA EKONOMIA AZÚL HO AUTORIDADES MUNISIPAIS NO LÍDERES KOMUNITÁRIUS

21 outubru 2025, Ministériu Finansas

Konsulta pública ida-ne'e hanesan ezersísiu fundamentál ida kona-ba partisipasaun demokrátika, ne'ebé imprenxindível (katak, esensial tebes) atu asegura katak estratéjia nasionál kona-ba dezenvolvimentu Ekonomia Azúl bele valida no hariku ho perspetiva lokál.

Primeiru-Ministru Kay Rala Xanana Gusmão hato'o diskursu abertura iha sala ida nakonu, serkade 700 partisipantes, inklui Xefes Suku ho Prezidentes Postus Administrativus, ne'ebé subliña vizaun política ho potensial Política no Planu Asaun kona-ba Ekonomia Azúl atu kontribui ba dezenvolvimentu nasionál ho forma integrada no inkluziva.

Tuir fali mai halo apresentasoens técnicas no detalladas, ne'ebé destaca prioridades ho oportunidades husi Ekonomia Azúl atu lori impulsiona (ka, dudu ba oin, promove) dezenvolvimentu nasionál, apoia biodiversidade ho konservasaun mariña no garante sustentabilidade ambientál ba longu prazu.

Halo tiha apresentasoens, Líder Komunitáriu sira partisipa iha sesoens kona-ba perguntas ho respostas, ne'ebé hato'o mós kontributus eskritos atu asegura katak sira-nia opinioens rasik, ho prioridades husi comunidade sira ne'ebé sira representa, bele reflète iha versaun final política.

Governu Timor-Leste rekoñese papél esensial husi lideransa komunitária sira iha definisaun kona-ba futuru husi rekursus mariñus país nian, hodi insentiva partisipasaun boot liu iha prosesu konsulta pública ne'e.

Faze konsultas tuirmai, relaciona ho Política no Planu Asaun kona-ba Promosaun Ekonomia Tasi ne'ebé Reziliente no Sustentável iha Timor-Leste [2025– 2035], ne'ebé sei halo iha tinan 2026, ho lideransa husi Primeiru-Ministru Kay Rala Xanana Gusmão, no sei abranje munisípiu sira hotu.

Diskursu Sua Exelénsia, Primeiru-Ministru Kay Rala Xanana Gusmão

Señór Primeiru-Ministru hahú nia intervensaun ne'ebé explika katak Ekonomia Azúl hahú husi foho sira no termina (ka, hakotu) iha tasi, hodi reforsa katak dezenvolvimentu sustentável tenke iha vizaun ne'ebé integrada entre ekosistemas terrestres no mariñus. Nia hanoin hikas nia vizita, iha tinan uluk, ba munisípiu Aileu, iha Seloí Kraik, ne'ebé nia hatteten ba populasau katak prezervasaun bee-matan ho florestas (ka, ai-laran) esensial tebetebes atu garante saúde mota sira-nian, no tuir mai, oseanu nian.





Nia destaca katak, maski ho avansus, país ne'e hasoru nafatin problemas boot hanesan poluisaun ho má jestaun ba rezíduus (ka lixu,fo'er sira), liuliu durante époka udan, bainhira arrasta (ka, dada,lori) lixu ne'e tama hotu iha tasi, hodi provoka graves impaktus ambientais. Nia alerta mós kona-ba difikuldades globais tanba alterasoens klimátikas, subliña katak Timor-Leste, hanesan illa ida ne'ebé tama iha Triángulu Korál — nia luan husi Filipinas to'o Timor-Leste —, no iha responsabilidade boot ba protesaun ninia biodiversidade mariña, ne'ebé oras ne'e hetan ameasa tanba explorasaun turística ho práttikas umanas ne'ebé la sustentáveis.

Primeiru-Ministru hanoin hikas períodu UNTAET, iha 2000, no hatudu nia laran-haksolok tanba povu timor finalmente sai livre no fiar iha futuru. Maibé nia subliña,katak liberdade ne'e agora tenke tradúz iha asoens konkretas hodi proteje rekursus naturais no asegura bein-estár ba jerasoens vindouras (ka, futuras). "Rikusoin loloos Timor-Leste nian, iha tasi laran", nia deklara, hodi reforsa importánsia atu conserva (ka, prezerva) no valoriza biodiversidade mariña hanesan baze ba subsisténsia povu tomak nian.

Durante ninia diskursu, fó-hatene mós katak iha novembru 2025, Timor-Leste sei simu ró-boot investigasaun sientífika internasionál ida,ne'ebé fó volta ona mundu iha misoens oseanugráfikas, no sei halo estudus kona-ba tasi Timor. Vizita ne'e sei kontribui hodi hametin koñesimentu sientífiku no apoia polítikas kona-ba jestaun sustentável rekursus mariñus.

S.E. Primeiru-Ministru ko'alia ba Prezidente Autoridade Munisipálsira,hodiapelakona-baprotesaunhovalorizasaun espasus naturais iha sira-nia responsabilidade,ne'ebé destaca turizmu komunitáriu hanesan modelu alternativu dezenvolvimentu lokál. Nia defende katak país ne'e tenke evita konstrusaun otéis boot no, di'ak liu promove turizmu ho baze komunitária, ne'ebé bele fó benefísius diretus ba populusaun sira no prezerva patrimóniu naturál no kulturál.

Nia subliña mós katak protesaun ambientál labele haree hanesan responsabilidade exkluziva (katak, mesak de'it) husi zona kosteira sira. "Maski ema ne'ebé moris dook husi tasi tenke hatene katak oseanu halo parte ita hotu nia moris,tanba husi nia mak ita hetan oksijéniu ho ekilibriu iha ita-nia planeta", nia dehan. Nia reforsa nesiedade atu eduka jovens, estudantes ho labarik sira kona-ba importánsia limpeza ho prezervasaun ambiente, hodi salienta katak Xefe Suku ho presidente postu administrativu lokál sira iha papél esensial tebes iha misaun.

Primeiru-Ministru destaca tan katak turizmu komunitáriu hanesan oportunidade real ida atu jera rendimentu no promove dezenvolvimentu sustentável iha comunidade sira. Nia refere ba ezemplu Barreira Boot Korais,iha Austrália, hanesan alerta ida kona-ba efeitos negativos hosi turizmu deskontroladu, ne'ebé provoka danus (ka, prejuízos) boot ba vida mariña.

Primeiru-Ministru apela ba ema hotu-hotu atu prepara an ba paradigma turizmu foun ida iha Timor-Leste, ne'ebé la hanesan ho modelu masifikadu destinu viziñu sira hanesan Bali.Nia insentiva atu kria oferta turística auténtika (ka,orijinál), ne'ebé kada munisípiu bele kontribui ho proposta gastronómika diversifikada, integrada no representativa ida husi nia patrimóniu kulturál.

Nia subliña sentralidade Ekonomia Azúl ba koñesimentu, valorizasaun ho uzu sustentável rikusoin sira husi tasi. Destaka papél fundamentál husi Xefe Suku sira iha difuzaun (ka, disseminasaun) ho implementasaun boas práttikas ambientais no turísticas iha comunidade sira, hodi reforsa katak tasi mak país nia ativu boot liuhotu ne'ebé tenke jere ho prudénsia no responsabilidade ba benefísius jerasaun prezente no futura sira.

Governu aposta, hanesan estratéjia prinsipál, iha turizmu komunitáriu, ne'ebé fó prioridade ba envolvimentu diretu husi comunidade lokál sira, hodi evita otéis boot no promove benefísius ekonómikus, sosiais ho ambientais ho forma inkluziva. Abordajen ne'e fó autenticidade ba experiéncia turística, prezerva patrimóniu naturál ho kulturál no asegura sustentabilidade Ekonomia Azúl Timor-Leste nian iha longu prazu.



Nia konklui nia diskursu hodi dehan katak Ekonomia Azúl hanesan instrumentu vitál ida hodi dezenvolve Timor-Leste ho forma sustentável no inovadora, ne'ebé ekilibra konservasaun ambientál ho progresu ekonómiku. Subliña katak rikusoin país nian la sukat de'it ho reseitas Estadu, maibé ho melloria kondisoens moris comunidade tomak nian, liuhusi valorizasaun rekursus lokais.



Aprezentasaun Polítika ho Planu Asaun kona-ba Ekonomia Azúl – Kuadru Estratéjiku: Eixus, Pilares ho Objetus Estratéjikus

Durante konsulta pública kona-ba Polítika ho Planu Asaun Ekonomia Azúl [2025-2030], ne'ebé realiza ho autoridades munispais no líderes komunitáriu, Diretora Ezekutiva Gabinete Fronteiras Terrestres no Marítimas, Elizabeth Exposto, apresenta, polítika ne'e, ne'ebé aprova ona ein-prinsípiu husi Konsellu Ministrus iha 25 juñu 2025.



Polítika ne'e estrutura ba parte tolu: introdusaun ho enkuadramentu jerál; kuadru estratéjiku, ho vizaun «Timor ne'e TASI!», objetivu dezenvolvimentu marítimu sustentável ho misaun protesaun reziliante ba rekursus mariñus; no planu asaun detalladu iha tabela ho pilares, objetivus, asoens, responsáveis no prazus.

Hatuur iha eixu haat:

- Investigasaun, edukasaun ho komunikasaun (Koñese Tasi);
- Prezervasaun ho konservasaun mariña (Respeita Tasi);
- Utilizasaun sustentável tasi (Moris ho Tasi);
- Medidas transversais ba implementasaun (saneamentu báziku, jestaun zonas úmidas (katak, udan ho bee barak), dezenvolvimentu rurál, Konta Satélite Tasi ho planeamentu/finansiamentu).

Diretora Ezekutiva apela kona-ba apoiu husi autoridade lokál ho comunidade sira iha implementasaun polítika, liuhusi parserias ho Governu, parseirus dezenvolvimentu, ONGs no setór privadu. Subliña, tan, katak rekursus mariñus Timor-Leste nian mak hanesan baze ba dezenvolvimentu inkluzivu no ba konservasaun globál.

Kontinuasaun apresentasaun relaciona ho Polítika no Planu Asaun kona-ba Ekonomia Azúl – Kuadru Estratéjiku: Eixus, Pilares ho Objetus Estratéjikus, husi Diretora Unidade Legál, Adelsia Silva ho Ofisiál Komunikasaun, Elvis Guterres.



Iha períodu loraik, sesaun ne'e prosege (ka, kontinua) ho apresentasaun detallada Kuadru Estratéjiku Polítika ho Planu Asaun kona-ba Ekonomia Azúl.

Koordenadora Unidade Ekonomia Azúl, Inês Araújo-Gonçalves, foka nia apresentasaun iha Eixu 3: Utilizasaun Sustentável – Moris ho Tasi.



Sesaun Perguntas no Respostas

Fó tempu ba autoridade lokál ho Xefe Suku sira atu hato'o sira-nia opinioens ou halo perguntas relaciona ho temátika ne'ebé diskuti ona ho kestoens pertinentes seluk ba sira-nia comunidades. Prátika ne'e halo parte prosesu konsulta ho partisipasaun komunitária, ne'ebé permite líder lokál sira apresenta nesidades ho preokupasoens husi sira-nia comunidades, hodi nune'e garante envolvimento ho lejitimidade boot liu iha desizaun sira ne'ebé foti.



Rezumu husi Intervensaun sira iha Sesoens Perguntas no Respostas

Durante sesaun sira ne'ebé realiza iha períodos dadeer ho loraik, partisipante sira simu di'ak tebes Política kona-ba Ekonomia Azúl (PEA) no hatudu disponibilidade atu kolabora iha nia implementasaun. Intervensaun sira hatudu aspetus esensiais ba fortalecimento desenvolvimento sustentável zonas kosteiras no montañozas (ka, foho sira), no mós ba garantia kona-ba jestaun responsável ba rekursus naturais.

Iha sesaun dadeer, salienta kestoens relevantes, hanesan nesidade atu promove asoens konkretas iha rejiuens montañozas, ne'ebé rekoñese katak Ekonomia Azúl hahú iha foho no hakotu iha tasi

Partisipante sira hato'o preokupasaun kona-ba fraka aplikasaun leis ambientais, liuliu sai husi kapitál, no husu atu reforsa atividades sensibilizasaun ho fiskalizasaun iha nivel lokál. Subliña mós importánsia atu aseguara continuidade PEA no atu implementa medidas efetivas kona-ba protesaun ambiental, no destaca mós valorizasaun ekonómika ho kontrolu ba uzu plástikus deskartáveis (katak, uza dala ida de'it).



Iha período loraik, intervensaun sira sentra iha nesidade atu bandu prátikas peska predatórias – hanesan uzu produsus kímikus no eksplozivus – no atu reforsa edukasaun ambiental ba peskadór sira. Bele subliña, mós, pertinénsia (ka, nesidade) fortalecimento kapasidades técnicas iha munisípius, liuhusi asoens formasaun ho interkambius internasionais. Partisipante sira rekomena tan kona-ba envolvimento comunidades iha kampañas hanesan limpeza tasi-ibun, insentivu ba turizmu sustentável bazeia iha tradisoens lokais ho valorizasaun ekosistemas mariñus, ho destake ba kuda mangais.



Pontu importante sira seluk ne'ebé aborda ona, inklui reforsu iha fiskalizasaun marítima atu kombate peska ilegál, melloria infraestruturas – hanesan

SESAUN PREZENSIAL

patrulha. Sujere mós kria saun sentrus resiklajen no fó insentivus ekonómikus ba lideransa lokál sira. Apresenta mós propostas relasiona ho reativas saun (katak, halo hikas) projetus agríkolos.

Hanesan sínteze (ka, rezumu), intervensaun hirak-ne'e, reflète preokupasaun husi partisipante sira kona-ba promosaun sustentabilidade ambientál, valorizasaun komunidades lokais ho nesesidade integrasaun boot liu ho apoiu husi parte instituisaun públika sira, atu nune'e garante konkretizasaun ho kontinuidade objetivus Política Ekonomia Azúl.

Post-its fahe hotu ona ba partisipante sira iha Konsulta Públika relasiona ho Política ho Planu Asaun kona-ba Ekonomia Azúl atu sira bele formaliza komentárius, sujestoens ho preokupasoens kona-ba eixus estratéjikus política nian.

Formulárius mós fahe durante Konsulta Públika relasiona ho Política ho Planu Asaun kona-ba Ekonomia Azúl Timor-Leste, ne'ebé realiza iha 21 outubru 2025, ho objetivu rekolla komentárius, mensajens ho sujestoens husi partisipante sira. Inisiativa ida-ne'e hanesan parte husi esforsu Governu atu aseguira prosesu partisipativu, transparente no inkluzivu, ne'ebé envolve autoridades munisipais, líderes komunitárius.

Tuir fali mai lista komentárius kada Autoridade Munisipál.

| | Munisípiu | Komentárius husi Xefe Suku sira |
|--------------|-----------|---------------------------------|
| | Aileu | 20 |
| | Ainaro | 12 |
| | Ataúro | 2 |
| | Baucau | 34 |
| | Bobonaro | 18 |
| | Covalima | 8 |
| | Dili | 8 |
| | Ermera | 39 |
| | Lauém | 5 |
| | Liquiça | 6 |
| | Manatuto | 7 |
| | Manufahi | 12 |
| | Viqueque | 8 |
| | RAEOA | 8 |
| Total | | 187 |





Husi realizasaun konsulta pública relaciona ho Política no Planu Asaun kona-ba Ekonomia Azúl, rejista ona konsiderasaun ho kontributu barak ne'ebé merese atensaun iha etapa finalizasaun ho implementasaun dokumentu estratéjiku.

Hanesan sínteze, partisipante sira salienta mak importánsia atu:

- Integra kontribuisoens ne'ebé rekolla ona, inklui formuláriu ho komentáriu ne'ebé hato'o durante sesoens prezensiais ho online, iha relatóriu final konsulta pública. Dokumentu konsolidadu ida-ne'e tenke partilla ho ministériu kompetentes, autoridades munisipais ho parseirus dezvoltimentu, hodi promove transparénsia ho artikulasaun institusionál.
- Partilla dokumentu konsolidadu ho ministériu kompetentes, autoridades munisipais ho parseirus dezvoltimentu, hodi promove transparénsia ho artikulasaun institusionál.
- Prosege (ka, continua) no intensifika (ka, aumenta) atividades sensibilizasaun ho edukasaun kona-ba Ekonomia Azúl iha munisípius, atu nune'e hametin koñesimentu komunidadade sira-nian kona-ba práttikas sustentáveis no kona-ba papél prezersaun mariña iha dezvoltimentu nasional.
- Rekomenda halo diálogu ho Sua Exelénsia Ministru Administraun Estatál ho Sua Exelénsia Ministra Finansas, atu avalia kriasaun mekanizmu apoiu ida.

- ou insentivu finanseiru ba Xefe Suku sira, hodi rekoñese papél fundamentál ne'ebé sira dezempeña iha nível komunitáriu.
- Estudu Komparativu ho Envolvimentu Komunitáriu: Xefe Suku sira hotu husu atu halo estudu komparativu, ne'ebé permite envolve sira iha kualkér atividade relaciona ho Ekonomia Azúl, atu nune'e reforsa no aumenta sira-nia koñesimentus ho kapasidades.
- Fortalese koordenasaun interministeriál entre entidade governamental sira ne'ebé intervein iha domínium Ekonomia Azúl, hodi asegura ezekusaun integrada no efikáz husi Planu Asaun.

Destaka mós rekoñesimentu papél fundamentál husi autoridade lokal ho Xefe Suku sira iha mobilizasaun komunitária no iha implementasaun políticas setoriais.

Prosesu konsulta pública reitera empenhu Governu atu garante abordajen partisipativa, inkluziva no bazeia iha evidénsias, ne'ebé reforsa kompromisu ho dezvoltimentu sustentável rekursus mariñus no kosteirus ba benefísiu jerasoens presentes no futuras.

Rekomendasaun hirak-ne'e reflète kontributu kolektivu no plural husi partisipante sira, ne'ebé sei konsidera didi'ak iha konsolidasaun ho implementasaun futura Política no Planu Asaun kona-ba Ekonomia Azúl Timor- Leste.



Diskursu Enserramentu

Sesaun enserramentu prezide husi Sua Exelénsia, Primeiru-Ministru, ne'ebé agradese ba intervensoens ho kontributus ho valór boot tebes ne'ebé apresenta durante sesaun, hodi rekoñese empeñu ho partisipasaun ativa husi autoridade munispál ho líder komunitáriu sira hotu.

Iha okaziaun, Primeiru-Ministru propoin atu Dia Nasionál Tasi komemora iha 5 juñu, ne'ebé koinside (ka, monu) iha Dia Mundial Ambiente, hanesan forma ida atu valoriza oseanu no promove kultura respeitu ho protesau rekursus mariñus. Proposta ne'e ema hotu-hotu ne'ebé presentes simu.

Iha nia intervensaun, nia apela kona-ba continuidade kolaborasaun entre Governu Sentrá, Autoridades Munispais ho Komunitades Lokais, subliña katak susesu husi implementasaun Política Ekonomia Azúl sei depende ba empeñu konjuntu ho koezaun husi nível governasaun tomak. Nia ennfatiza (ka, realsa) katak ekonomia Azúl ita tenke entende hanesan oportunidade ida ba kreximentu inkluzivu no sustentável, ne'ebé bele fortalese ekonomia nasional no, aumezmu tempu, prezerva ekosistema sira ne'ebé sustenta povu timor tomak nia moris ho bein-estár (ka, moris-di'ak).

Atu taka nia diskursu, Primeiru-Ministru husik hela mensajen simbólka ida kona-ba uniaun ho solidariedade, hodi dehan katak, “se nia liman mak naruk natoon, nia sei lolo hodi hako'ak hotu ema sira ne'ebé presentes, no sei la husik ema ida iha li'ur” nu'udár expresaun husi ninia kompromisu ho Timor-Leste Azúl, Sustentável no Inovadór.



5 KONKLUZAUN

Konsulta públika kona-ba Polítika ho Planu Asaun ba Promosaun Ekonomia Tasi ne'ebé Reziliente no Sustentável iha Timor-Leste [2025-2035], no realiza iha formatu online no prezensial, hanesan ezersisiu importante ida kona-ba partisipasaun demokrátika no inkluziva.

Ba primeira vez iha Timor-Leste, implementa prosesu estruturadu no abertu ida kona-ba auskultasaun (ka audisaun, sondajen) nasional relasiona ho polítika estratéjika ida ba setór mariñu, hodi posibilita rekolla kontribuisaun oioin husi líderes komunitáriu, autoridades munisipais, setór privadu, sosiedade sivil, akademia, ONGs, sidadauns interesadus ho parseirus dezenvolvimentu.

Opinaun sira ne'ebé hato'o durante konsulta hatudu konsensu boot ida kona-ba relevánsia edukasaun hodi fomenta práktikas sustentáveis, rekoñesimentu papél fundamentál husi comunidades lokais hanesan protagonistas transformasaun ho nesesidade koordinasaun institucionál di'ak atu garante susesu iha implementasaun polítika.

Nune'e, prosesu ne'e reforsa aliserse sira ba governasaun kolaborativa iha dominiu Ekonomia Azúl. Kontributus husi participante sira, especialmente husi parseirus dezenvolvimentu, kolmata (ka, preenxe) lakunas esensiais husi versaun inisial, ne'ebé kapta (ka, kaer) ba opinioens relevantes husi kamada sosial sira no fakulta (ka, fasilita) ba sidadaun sira-nia partisipasaun ativa no inkluziva iha konstrusaun polítika ida-ne'e.

Konsulta públika hanesan marku esensial ida, ne'ebé sei kulmina ho aprovasaun final iha Konsellu Ministrus iha janeiru 2026 ho inisiu implementasaun medidas no asoens hahú husi primeiru trimestre 2026, liutiha faze socializasaun ne'ebé lidera husi Sua Exelénsia Primeiru-Ministru Kay Rala Xanana Gusmão.

Nune'e, iniciativa ne'e orienta asoens futuras atu konsolida Timor-Leste hanesan ezemplu ida kona-ba jestaun responsável no sustentável ba nia rekursus mariñus ne'ebé boot lahalimar — hodi garante legadu perene (katak, ne'ebé dura kleur) ba jerasoens atuais no aban-bainrua nian.



6

ANEKSUS

Dokumentus ne'ebé disponibiliza iha Konsulta Públika (online no Konsulta Prezensiál iha 21 outubru 2025):

- Ajenda Konsulta Públika relasiona ho Polítika ho Planu Asaun kona-ba Ekonomia Azúl ho Autoridades Munisipais no Líderes Komunitáriu
- Formuláriu partisipasaun (Formuláriu Ba Partisipasaun Konsulta Públika)
- Sumáriu Ezekutivu: Polítika ho Planu Asaun kona-ba Promosaun Ekonomia Tasi ne'ebé Reziliente no Sustentável iha Timor-Leste [2025-2035]

AGENDA DA CONSULTA PÚBLICA DA POLÍTICA E PLANO DE AÇÃO DA ECONOMIA AZUL COM AS AUTORIDADES MUNICIPAIS E LÍDERES COMUNITÁRIOS

21 de outubro de 2025

| HORAS | ATIVIDADES |
|----------------------------|---|
| 8:00 AM – 9:00 AM | Registo |
| 9:00 AM – 9:05 AM | Video 1: <i>Biodiversidade marinha e o potencial da Economia Azul em Timor-Leste</i> |
| 9:05 AM – 10:00 AM | Abertura pelo Primeiro-Ministro |
| 10:00 AM – 10:05 AM | Video 2: Economia Azul: Política e Plano de Ação para a Promoção de uma Economia do Mar Resiliente e Sustentável em Timor-Leste [2025-2035] |
| 10:05 AM – 10:30 AM | Apresentação sobre a Política e o Plano de Ação da Economia Azul – Quadro. Estratégico: Eixos, Pilares e Objetivos Estratégicos |
| 10:30 AM – 11:00 AM | Pausa para Café |
| 11:00 AM – 12:00 PM | (Cont.) Apresentação sobre a Política e o Plano de Ação da Economia Azul – Quadro Estratégico: Eixos, Pilares e Objetivos Estratégicos |
| 12:00 PM – 12:30 PM | Perguntas e Respostas |
| 12:30 PM – 2:00 PM | Pausa para Almoço |
| 2:00 PM – 3:30 PM | (Cont.) Apresentação sobre a Política e o Plano de Ação da Economia Azul – Quadro Estratégico: Eixos, Pilares e Objetivos Estratégicos |
| 3:30 PM – 4:00 PM | Perguntas e Respostas |
| 4:00 PM – 5:10 PM | Contribuições escritas das autoridades municipais e dos líderes comunitários |
| 5:10 PM – 5:30 PM | Considerações finais |



Ekonomia Azul

Ha'u-nia Tasi, Ha'u-nia Timor

**SUMÁRIU EZEKUTIVU
EKONOMIA AZÚL: POLÍTIKA
HO PLANU ASAUN KONA-
BA PROMOSAUN EKONOMIA
TASI NE'EBÉ REZILIENTE NO
SUSTENTÁVEL IHA TIMOR-
LESTE**

2025-2035

SUMÁRIU EZEKUTIVU

EKONOMIA AZÚL: POLÍTICA HO PLANU ASAUN KONA-BA PROMOSAUN EKONOMIA TASI NE'EBÉ REZILIENTE NO SUSTENTÁVEL IHA TIMOR-LESTE [2025-2035]

Introdusaun

“Política ho Planu Asaun kona-ba Promosaun Ekonomia Tasi ne'ebé Reziliente no Sustentável iha Timor-Leste” hakarak estabesele vizaun política ho estratéjia asaun IX Governu Konstitusionál nian, ba setór ne'e, ba tinan sanulu oin mai (2025-2035).

Iha ámbitu promosaun ekonomia tasi nian ne'ebé reziliente no sustentável, ho nia pilár fundamentál mak abordajen ekosistémika ¹, ne'e mak hakarak promove valorizasaun oseanu ho rekursus mariñus, liuhusi planeamentu ida ne'ebé ekilibradu iha nia utilizasaun no iha dezvoltamentu atividades ekonómikas, ne'ebé konsidera kapasidade ekosistemas mariñus hodi suporta atividade hirak-ne'e ho kapasidade iha ninia rekupersaun.

Perspetiva ne'ebé adota ona, hakarak liuliu mak mudansa iha paradigma kona-ba dezvoltamentu ekonómiku Timor-Leste nian, liuhusi adosaun abordajen integrada ne'ebé ekilibra uzu sustentável rekursus mariñus, melloria kondisoens moris husi populasaun sira ho protesaun ekosistemas mariñus, aumezmu tempu impulsiona, ho forma inkluziva, kriaun empregu, erradikasaun pobreza ho mitigasaun (ka, redusaun) impaktus husi alterasoens klimátikas.

Governu, bainhira investe iha ekonomia azúl, hakarak foka liuliu iha fatór tolu: **sosiál**, ba redusaun pobreza ho kriaun rendimentus no melloria kondisoens moris; **ekonómiku**, ne'ebé inklui konsumu, produsaun, komersializasaun, servisu ho investimentus; no **ambientál**, ba protesaun ekosistemas ho rekursus naturais.

Timor-Leste Estadu marítimu ida

Timor-Leste hanesan Estadu meia-illa ida hadulas ho bee ne'ebé moos-nabilan no nakonu ho biodiversidade. Lokaliza iha Triángulu Korál, hanesan rejiaun ida ne'ebé alberga (ka, kobre, abranje) área ida hotu ho konsentrasaun espésies ²mariñas boot liu iha planeta.

¹ Perspetiva ne'ebé konsidera interasoens kompleksas entre seres vivos (katak, buat hotu ne'ebé moris iha mundu ne'e) ho elementus naun vivos (katak, maten/la moris), hanesan rai, bee ho klima ekosistema ida nian.

² <http://ctatlas.koraltriangleinitiative.org/About>

Triángulu Korál inklui 30% resife korál sira iha mundu. Rejiaun, ne'ebé moris serkade 76% espésies korál koñesidas, iha mós diversidade ikan resife ne'ebé boot liuhotu, ho 2 500 ou 37% espésies ikan resife²nian. Triángulu Korál ne'e, luan 6 000 000 km², rai ho tasi, ne'ebé lokaliza iha territóriu Indonézia, Malázia, Papua Nova Giné, Filipinas, Illas Salomão ho Timor-Leste, no hanesan hela-fatin ba espésies neen entre espésies tartaruga hitu iha mundu, no mós ba baleias azuis, kaixalotes ho dugongus.

Timor-Leste, ne'ebé hadulas ho resife korál sira ne'ebé riku tebetebes no ai-laran boot mangais, iha nia espasu marítimu nasionál importante ida ho rekursu mariñu barak lahalimar, ne'ebé nia povu rasik valoriza husi kedan tempu bei'ala sira. Relasaun ne'ebé kleur tebes ona entre timoroan sira ho oseanu, halo sustentabilidade ambientál enraiza (katak, kuda-metin) iha kultura Timor-Leste nian, hodi dala barak halo serimónias tradicionais, hanesan Tara Bandu, ba konsersaun ambientál ho sustentabilidade futura.

Governu fiar katak, liuhusi desenvimentu ekonomia azúl – ekonomia tasi ne'ebé reziliente no sustentável – sei kontribui ba uzu sustentável oseanu, tasi ho zonas kosteiras no, konsekuentemente, ba kreximentu ekonómiku, mellores kondisoens sosiais ho prezersaun ambientál.

Prinsípius orientadores Kuadru Polítiku no Planu Asaun kona-ba Ekonomia Azúl Timor-Leste

Polítika ho Planu Asaun kona-ba Ekonomia Azúl Timor-Leste, **ne'ebé nia versaun kompleta tenke konsulta iha <https://www.gftm.gov.tl/tdt/konsulta-publika-ea/>**, tau iha konsiderasaun prinsípius ho objetivus orientadores hanesan tuirmai ne'e:

— **Boa Governasaun Oseanu:** kria estrutura polítika no administrativa di'ak ida ba desenvimentu ekonomia azúl, inklui revizaun ho kriaun kuadru legál nesésáriu no adekuadu, no mós polítikas asociadas (katak, ne'ebé iha ligasaun) hodi asegura jestaun ida ne'ebé koordinada, integrada, intersektoriál ho multidixiplinár. Boa governasaun oseanu inklui nesésária interasaun rai-tasi, ne'ebé ezije koordinasaun intersektoriál ho artikulasaun entre ordenamentu territóriu terrestre no marítimu.

— **Protesaun, prezersaun no konsersaun meu ambiente mariñu:** avalia medidas ne'ebé hala'o hela ba protesau, prezersaun ho konsersaun ekosistemas mariñus, haree ba ninia adekuasaun ho efisiénsia, no mós kria medidas foun hodi garante sustentabilidade ho reziliénsia ekosistemas mariñus. Levantamentu ho estudus kona-ba biodiversidade tenke apoia husi baze sientífika sólida.

— **Responsabilidade interjerasional:** meu ambiente mariñu konvoka jerasaun hotu-hotu no hanesan legadu importante ida ne'ebé tenke proteje, ba benefisiu futuras jerasoens. Tanba ne'e, ba investimentu ne'ebé seguru no dura kleur ba futuru ekonomia azúl nasional, importante forma jerasaun azúl ida no promove koñesimentus kona-ba importánsia oseanu ho rekursus mariñus, hodi asegura partisipasaun ativa husi komidade sira no públiku ein-jerál. Importante mós fó hatene kona-ba valór tasi hanesan ativu estratéjiku ida ho nia importánsia ba dezvoltimentu ekonómiku sustentável timoroan tomak nian.

— **Dezvoltimentu sustentável:** susesu ekonomia azúl depende ba planeamentu, monitorizasaun ho avaliasaun kona-ba polítikas, programas ho projetus ne'ebé bele promove dezvoltimentu ekonómiku ho forma ekilibrada, ne'ebé liafuan “utiliza” la hanesan ho “esgota (ka, halo mohu)” rekursus, no tenke tau iha konsiderasaun prinsípius sustentabilidade ambiental, sosiál no ekonómika.

— **Apoiu ba inovasaun:** ekonomia azúl iha ligasaun ho inovasaun tekonojika no ba kriasau oportunidades negósias foun, insentiva peskiza ho dezvoltimentu tekonojias ho prátikas foun. Timor-Leste, Estadu joven no frájl ida, ne'e mak aposta iha inovasaun tekonojika hanesan dezafiu ida, la'ós de'it tanba eskasés (ka, limitasaun) rekursus finanseirus, maibé mós tanba kapasidade rekursus umanus rasik ne'ebé karesé (ka, falta) koñesimentus iha áreas espesífikas relaciona ho dezvoltimentu ekonomia azúl.

— **Kooperasaun nasional, husi poder sentrá ba lokal:** implementasaun ekonomia azúl iha Timor-Leste implica partisipasaun efetiva hosi komponente sosiedade sira hotu, hahú husi poder sentrá to'o lokal, ne'ebé envolve entidades públicas, privadas ho sosiedade sivíl, inklui organizasoens fetu, asosiasoens ema sira ho defisiénsia, imprensa no autoridades lokais. Parseiru estratéjiku hirak-ne'e krusiais tebes ba identifikaun ameasas ho dezafius, no mós ba oportunidade sira ne'ebé ekonomia azúl oferese. Nune'e, mak ezersísiu plenu direitus kona-ba informasaun ho partisipasaun pública hanesan elementus fundamentais prosesu ne'e nian. Koñesimentu privilejiadu husi komidade lokal sira sei sai fundamentál tebes hodi define no implementa polítikas ne'ebé adequadas ba dezvoltimentu ekonomia azúl, ne'ebé sira-nia partisipasaun ativa, liuhusi kolaborasaun dí'ak ho Governu no parseirus públicos ho privados, nasionais no internasionais, hanesan kondisaun indispensável husi vizaun política no estratéjika ida-ne'e.

— **Kooperasaun internasionál ho rejional:** fomenta iniciativas kooperasaun internasionál no rejional hodi promove ekonomia azúl iha Timor-Leste, hanesan forma ida atu supera (ka, ultrapasa) dezafius globais ho rejionais, tanba rekursus mariñus la iha fronteiras no nia protesaun ho konservasaun prezisa abordajen global no rejional ida. Husi parte seluk, partilla koñesimentus ho experiénsias, no mós buka boas prátikas ho kapasidades técnicas husi países amigus no kooperantes, krusiais tebes iha primeira fase dezvoltimentu ekonomia azúl. Timor-Leste sei asegura nia partisipasaun iha

fórum internasionál barabarak no uza plataformas kooperasaun ne'ebé nia halo parte, ho objetivu rua, mak atu dezenvolve parseries estratéjikas no partisipa ativamente iha kuadru global governasaun tasi ho oseanu sira.

Aleinde ne'e, konsidera hotu ona setór atividade ekonómika barabarak ba elaborasaun kuadru estratéjiku dezenvolvimentu nasional. Konsidera, hahú husi atividades tradisionais, hanesan peska, setór marítimu-turístiku ho componente lojística no infraestruturas, hanesan transporte marítimu ho konstrusaun no reparasaun navál, to'o iha atividades ho inovasaun teknolójika boot liu, hanesan extrasaun petróleu ho gás *offshore*, dezenvolvimentu enerjias renováveis *offshore* no bioteknolojia mariña. Atividade hirak-ne'e ilustra hotu iha kuadru tuirmai ne'e:



Konseitu kona-ba Ekonomia Azúl Timor-Leste

Konseitu kona-ba ekonomia azúl iha hela kreximentu laran, iha tinan sira dahikus ne'e no iha parte hotu-hotu iha mundu. Ne'e tanba sientifikamente simu ona katak oseanu ida ne'ebé saudável bele fó solusoens ba dezafiu oioin iha mundu atuál.

Iha Timor-Leste, tasi marka (ka, hatadak) tiha ona país nia pasadu no hanesan pilár ida hotu iha vizaun kona-ba futuru. Ba povu Timor-Leste, tasi hanesan parte integrante husi nia modu moris no iha nia significadu espirituál. Tuir lenda, timoroan sira mak lafaek nia beioan – *“nia mate tiha, nia isin-lolon nakfilak ba rai Timor, no nia kotuk taraktarak sira nakfilak ba foho ho rai-tetuk aas sira, no oseanu mak nia horik-fatin dahikus”*.

Ema timoroan barak depende ba tasi ba sira-nia sustentu ho subsisténsia, hodi sira peska (ka, tiha ikan) no rekolla espésies mariñas. Resifes korál riku boot, ho biodiversidades ida hotu ne’ebé boot liu iha mundu, ho íngremes falésias subakuátikas (katak, foho lolon aas sira iha tasi okos) ne’ebé hadulas rai Timor-Leste, sai ona hanesan atrasaun boot ida ba turista sira.

Bee manas ho praias tropikais ne’ebé furak, migrasaun tinan-tinan husi baleias azuis, golfiñus ho dugongus, kultura distintiva (ka, diferente) iha rejiaun ho povu akollédór (katak, gosta simu bainaka), mak hanesan kondisoens ideais atu dezenvolve turizmu ho baze komunitária, ne’ebé sei kontribui ba kriasaun empregu no ba redusaun pobreza, maibé la redúz kuantidade ho diversidade rikeza mariña.

Peska hanesan atividade fundamentál ida ba ekonomia timornian. Maibé, tanba falta kapasidade Timor-Leste nian atu halo vijilánsia efetiva ba nia espasu marítimu nasional, mak permite peska ilegál, ne’ebé pratika husi frota komersiál estranjeira sira, hodi kauza prejuízu ekonómiku ho ambientál boot lahalimar. Nesesáriu hetan solusoens hodi hapara situasaun ne’e no garante sustentabilidade espésies ikan sira ne’ebé ema explora daudaun ho forma deskontrolada no ilegál.

Husi sorin seluk, barak tebetebes potenciáldades dezenvolvimentu atu explora, hahú husi akikultura, ba transporte ho infraestruturas marítimas, instalasoens no atividades portuárias, no mós enerjias renováveis mariñas. Ida-ne’e apoia ho planu sustentabilidade oseánika ida ne’ebé bele regula área marítima iha jurisdisaun timor nian, ne’ebé dezenvolvimentu ekonómiku no sosiál ba longu-prazu la haluha protesaun ekosistema mariñu.

Ne’e sei intrinsekamente relasiona ho objetivu Timor-Leste atu hetan soberania tomak ba nia territóriu marítimu, ne’ebé sei depende ba delimitasaun fronteiras ho Estadu viziñu sira. Tanba ne’e mak Timor-Leste, foin daudaun, limita ona nia fronteiras marítimas ho Austrália.

Timor-Leste konklui ona, ho susesu, delimitasaun fronteiras marítimas ho Austrália, liuhusi prosesu istóriku konsiliaun obrigatória tuir Konvensaun Nasoens Unidas kona-ba Direitu ba Tasi (CNUDM), ne’ebé Timor-Leste hanesan Estadu-parte. Rezultadu husi prosesu konsiliaun obrigatória ne’e rezulta selebrasaun *“Tratadu entre Repúblika Demokrátika Timor-Leste ho Austrália ne’ebé estabelese ida-idak nia fronteiras marítimas iha Tasi Timor”*, ne’ebé asina iha marsu 2018 no ratifika iha agostu 2019.

Atualmente, país ne'e halo esforsus boot atu delimita fronteiras marítimas ho Indonézia, hodi nune'e habelar ninia potenciál explorasaun rekursus, liuliu kona-ba Zona Ekonómika Ekkluziva, ne'ebé inklui direitus explorasaun rekursus iha bee laran,hanesan peska.

Tanba razaun hirak-ne'e hotu, mak konseitu kona-ba ekonomia azúl ne'ebé serve ba Timor-Leste mak ida ne'ebé asosia potenciál ekonómiku rekursus mariñus ho nesesáriu dezentvolvimentu sustentável nasonál, maibé la haluha protesau ho konsersasaun natureza ho reziliénsia ambientál.Nune'e, konseitu ekonomia azúl ba Timor-Leste mak:

Konjuntu polítikas ho asoens integradas, ho enfoque(ka, sentru) iha tasi, ne'ebé apoia dezentvolvimentu ekonómiku no sosiál país nian,ho baze iha boas práttikas ambientais,ho forma ne'ebé diversifikada, sustentável no inkluziva, hodi garante ekilibriu ba longu-prazu husi ekosistemas ho rekursus mariñus.

Kuadru Estratéjiku Ekonomia Azúl Timor-Leste

Importante relembra katak ekonomia azúl abranje espasu akuátiku sira hotu, inklui oseanu, tasi, tasi-ibun, bee-lihun,mota ho bee sira iha rai-okos, hodi nune'e la inklui de'it espasus kosteirus país nian,maibé mós rai-laran, hanesan foho sira iha país ne'e.

Klaru ona katak maioria problemas oseanu nian mai husi tasi,hanesan liuhusi lixu mariñu (inklui plástiku); poluisaun husi efluentes industriais no doméstikus ho rezíduus agríkolos, no kreximentu áreas urbanas kosteiras. Ne'e mai aumenta tan presaun boot ba oseanu,ne'ebé kondisiona mós ho dezafius hanesan sobrepeska, peska ilegál, naun deklarada no naun regulamentada, akesimentu bee, asidifikasaun, eutrofizasaun ho dezoksijenasau oseanu, no konsekuente perda biodiversidade mariña ho degradasaun ekosistemas mariñus ho kosteirus.

Ho baze iha konseitu Ekonomia Azúl ne'ebé adota ba Timor-Leste, Governu define ona vizaun ida, objetivu ida ho misaun ida.

Nune'e,Governu Timor-Leste partilha nia vizaun, katak:

Investe iha kreximentu setores kosteirus, mariñus no marítimus, bele asegura dezvoltimentu ne'ebé sustentável ho inkluzivu timoroan tomak nian, aumezmu tempu promove oseanu ida ne'ebé saudável ho baze iha koñesimentu sientífiku.

No karik ida-ne'e mak vizaun Timor-Leste nian, mak mote ne'ebé hodi komplementa mak ne'e: *"Timor ne'e TASI! Timor, Azúl, Sustentável no Inovadór"*.

Prinsipál **objetivu** Polítika ho Planu Asaun kona-ba Promosaun Ekonomia Tasi ne'ebé reziliente no Sustentável iha Timor-Leste mak ne'e:

Define no implementa polítikas ho inisiativas estratéjikas no integradas, ne'ebé rekorre ba koñesimentu sientífiku no komunitáriu, no bele transforma área marítima ho kosteira, iha jurisdisaun timor nian, ba fonte oportunidades dezvoltimentu ekonómiku, sosiál e ambientál - sustentável no inkluzivu.

Objetivu ne'e sei sai relevante liután se ita konsidera katak bainhira adisiona ba dezafiu sira ne'ebé eziste ona iha país, hanesan País Menus Dezenvolidu (LDC iha sigla ingleza) no Pekenu Estadu Insulár Ein-Dezvoltimentu (SIDS iha sigla ingleza), Timor-Leste hasoru dezafius boot tan husi alterasoens klimátikas.

Tanba ne'e, Governu Timor-Leste simu, **misaun** atu:

Promove koñesimentu, protesaun, konsersaun ho uzu sustentável rekursus naturais mariñus no kosteirus iha ámbitu nasionál no internasionál, atu nune'e garante binómio (katak, elementu, fórmula rua): reziliénsia hasoru alterasoens klimátikas no dezvoltimentu ekonómiku, sosiál ho ambientál ba jerasoens atuais no futuras.

Kuadru Estratéjiku Ekonomia Azúl Timor-Leste

| | |
|-----------------|--|
| Vizaun | Investe iha kreximentu setores kosteirus, mariñus no marítimus katak asegura dezvoltimentu sustentável no inkluzivu ba timoroan tomak |
| Objetivu | Define no implementa polítikas ho inisiativas estratéjikas no integradas, ne'ebé rekorre ba koñesimentu sientífiku no komunitáriu, no bele transforma área marítima no kosteira, iha timor nia jurisdisaun, ba fonte oportunidades dezvoltimentu ekonómiku, sosiál no ambientál - sustentável no inkluzivu |
| Misaun | Promove koñesimentu, protesaun, konsersaun ho uzu sustentável rekursus naturais mariñus no kosteirus iha ámbitu nasionál no internasionál, atu nune'e garante binómio: reziliénsia hasoru alterasoens klimátikas no dezvoltimentu ekonómiku, sosiál ho ambientál ba jerasoens atuais no futuras |

EIXUS, PILARES HO OBJETIVOS ESTRATÉJIKUS EKONOMIA AZÚL

Estratéjia implementasaun Polítika ho Planu Asaun inklui prinsipais eixus asaun haat ne'ebé estrutura vizaun, no hatuur iha pilares orientadores ho objetivos espesífikus.

EIXU 1: INVESTIGASAUN, EDUKASAUN NO KOMUNIKASAUN (KOÑESE TASI)

Atu proteje, conserva no promove ambiente mariñu no kosteiru presiza koñese kapitál naturál ho importánsia husi servisu ne'ebé ekosistemas presta hodi fomenta dezenvolvimentu ekonómiku ida ne'ebé uza rekursus naturais ho forma sustentável.

Ekilíbriu entre dezenvolvimentu ekonómiku sustentável ho kapasidade reziliénsia husi oseau atu suporta diferentes atividades umanas, ne'e mak definisaun, pur-exelénsia, kona-ba ekonomia azúl. Nune'e, só ho boa siénsia mak sei bele koñese didi'ak tasi territóriu nasionál – espasu marítimu nasionál, no, konsekuentemente, iha prosesus desizaun ne'ebé di'ak hodi fó fatin ba boas polítikas públikas.

Husi sorin seluk, atu kontribui ba dezenvolvimentu sustentável presiza promove edukasaun ba labarik ho joven sira kona-ba importánsia oseau ho nia relevánsia ba saúde ho ekilíbriu planeta nian. Fundamentál katak labarik ho joven sira, no mós sidadaun sira hotu ein-jerál,bele iha asesu ba koñesimentu, kapasidade ho valór sira ne'ebé bele fomenta respeitu ba natureza, liuliu, respeitu ba meu ambiente mariñu.

Atu kria jersaun azúl ida, la presiza de'it servisu kona-ba kurrículus eskolares no akadémikus, maibé mós promove asoens formasaun ba profesór sira (ho rekursus edukativus no materiais ne'ebé adekuadus) atu nune'e dezenvolve koñesimentu, kapasidade kítika no, konsekuentemente, altera komportamentus.

Ikusliu, komunika koñesimentu ne'e no hagle'an kultura oseánika ida ne'ebé bele permite timoroan sira rekonekta-an ho sira-nia tasi no explora oportunidade hotu-hotu ne'ebé iha ligasaun ho tasi, la'ós de'it kona-ba jersaun reseitas ho oportunidades empregu, maibé mós utilizaun sustentável rekursus mariñus.

Komunika ekonomia azúl sei lori ba kompreensaun, kooperasaun ho jestaun nasionál ne'ebé boot liu kona-ba rekursus mariñus existentes, atu nune'e bele salvaguarda rekursu hirak-ne'e ba futuras jersaons.

Pilár 1: Investigasaun Sientífika Mariña

- Rejime Jurídiku kona-ba Investigasaun Sientífika Mariña Internasionál
- Levantamentu ho Estudu kona-ba Biodiversidade Mariña Timor-Leste

Pilár 2: Edukasaun, Formasaun ho Komunikaun Estratéjika

- Edukasaun no Formasaun Profisionál
- Sentrus Investigasaun no Edukasaun Mariña
- Patrimóniu Kulturál Mariñu no Subakuátiku
- Komunikaun Estratéjika no Kultura Oseánika

EIXU 2: PREZERVASAUN NO KONSERVASAUN BIODIVERSIDADE MARIÑA (RESPEITA TASI)

Iha ligasaun intrínseka (ka, spesífika) no anestrál (katak, husi tempu bei'ala sira) entre kultura ho ekosistemas mariñus iha Timor-Leste, ne'ebé hanesan mais-valia (ka, vantajen) ida ba prosesu dezenvolvimentu sustentável nasaun ho nia povu nian, no atu bele alkansa objetivus Polítika ho Planu Asaun kona-ba Promosaun Ekonomia Tasi ne'ebé Reziliente no Sustentável iha Timor-Leste.

Timor-Leste komprometidu ona ho protesaun oseanu no prezervasaun biodiversidade mariña, iha nível nasional, rejional no global.

Prinsípius bazilares ne'ebé hakerek iha Konstituisaun, prinsípius orientadores iha kuadru legal ne'ebé vigora hela ho kompromisus internasionais ne'ebé Timor-Leste asume ona, mak hanesan manifestasaun sinerjia entre koñesimentu ho práttikas kulturais ne'ebé eziste ona iha país relasiona ho tasi, valores ho aspirasoens povu timornian ho kompromisu polítiku kona-ba konservasaun no promosaun ambiente ho prezervasaun no uzu sustentável rekursus naturais.

Rekoñesimentu legál Tara Bandu, kostume tradisionál integrante husi kultura Timor-Leste nian ne'ebé regula relasaun entre ema ho ambiente hale'u nia, ne'ebé utiliza ba prezervasaun ekosistemas terrestres no mariñus, refleto kontektu ida-ne'e.

Protesaun ambientál ho biodiversidade mariña refere ba medida sira ne'ebé foti hodi prezerva no konserva rekursus naturais, flora, fauna ho *habitats* mariñus, no envolve konxensializasaun, prezervasaun ho uzu sustentável oseanu,tasi, mota ho estuárius (mota-ikun sira) ho sira-nia ekosistemas.

Ho baze iha enkuadramentu ida-ne'e mak sei halo jestaun ho protesaun mariña no kosteira, ne'ebé baibain define hanesan konjuntu práttikas, políticas ho estratéjias kona-ba konservasaun ho uzu sustentável rekursus mariñus no áreas kosteiras.

Sei adota medidas ne'ebé adequadas hodi reforsa prezervasaun ho konservasaun biodiversidade mariña, hanesan ordenamentu ho jestaun espasu marítimu nasionál, nu'udar espiña dorsál (katak, parte prinsipál) ekonomia azul, ein-termus abordajen integrada no ekosistémika husi espasu marítimu, ho interasaun loloos entre rai ho tasi no revizaun Áreas Mariñas Protejidas ba país, hodi formaliza nia deklarasaun, no mós define no implementa nia planus jestaun.

Rejime Jurídiku kona-ba Ordenamentu ho Jestaun Espasu Marítimu sei sai hanesan pilár fundamentál ba dezenvolvimentu ekonomia tasi ne'ebé sustentável iha Timor-Leste, halo artikulasaun ho área setoriál relevante sira seluk, hanesan ambiente, ekonomia, enerjia, turizmu, nst.

Área mariña protejida sira hanesan instrumentu esensial ida ba promosaun no prezervasaun meu ambiente mariñu, ne'ebé tenke utiliza kedan ho forma komplementár, ho rejime jurídiku kona-ba ordenamentu ho jestaun espasu marítimu.

Hanesan rezumu, konservasaun biodiversidade mak elementu sentrál ida husi Polítika ho Planu Asaun kona-ba Promosaun Ekonomia Tasi ne'ebé Reziliente no Sustentável iha Timor-Leste, nu'udar pilár transversál ida kona-ba boa governasaun.

Pilár 3: Jestaun ho Protesaun Mariña no Kosteira

- Ordenamentu no Jestaun Espasu Marítimu Nasionál
- Áreas Mariñas Protejidas
- Kooperasaun Transfronteirisa
- Reforsu Rejimes Avaliasaun kona-ba Impaktu Ambientál

Pilár 4: Konservasaun Biodiversidade Mariña

- Resifes Korál
- Mangais
- Algas ho Du'ut Tasi
- Setáseus, Tartarugas, Tubaroens, Dugongus ho espésies mariñas seluk

Pilár 5: Kombate Poluisaun Mariña ho Jestaun Rezíduus Pilár 6:

Sekestru (katak, simu no rai) Karbonu

EIXU 3: UTILIZASAUN SUSTENTÁVEL (MORIS HO TASI)

País ne'e abensoadu ho rekursus naturais, hanesan reservas gás ho petróleu, ne'ebé ho reseitas ne'ebé hetan bele suporta dezenvolvimentu nasionál durante liu dékadas rua (ka, tinan ruanulu-resin).

Maibé, ne'e rekursus naturais finitus (katak, bele hotu) no, tanba ne'e, Governu empenhadu ona atu investe iha diversifikasaun ekonómika, hanesan liuhusi ekonomia azul.

Hakarak atu comunidade timoroan sira bele konekta barak tan ho tasi no aproveita oportunidades dezvoltimentu sustentavel ne'ebé tasi proporsiona. Ne'e inklui, aleinde prezervasaun ho konservasaun ninia biodiversidade, oportunidade sira hanesan utilizaun sustentavel rekursus mariñus, ho konsekuente oportunidade kona-ba kriasaun empregu, jersaun rendimentus ho mellorias kondisoens sosioekonómikas, inklui iha setór saúde, edukasaun, kultura, desportu ho lazer.

Nune'e, Governu sei investe iha dezvoltimentu setores peskas, akikultura, turizmu ho enerjias renováveis, ne'ebé sei hetan retornus ekonómikus adisionais ho benefísiu sira seluk ba Timor-Leste, hanesan investe iha setores ekonómikus no industriais, hodi enkoraja dezvoltimentu setór privadu nasionál no investimentu diretu estranjeiru iha país.

Estratéjia ida-ne'e inklui reforsu kooperasaun internasionál, liuhusi partilha koñesimentus, experiéncias ho investimentus, ne'ebé denominadór komún mak oseau. Oseau ida ne'ebé liga Timor-Leste ho mundu no mundu ho Timor-Leste, no mós iha konfrontasaun dezafius komúns ne'ebé tau iha kauza seguransa, estabilidade ho dezvoltimentu sustentavel nasaun barak nian, liuliu Pekenus Estados Ilha Ein-Dezvoltimentu ho Países Menus Dezvolvidus.

Pilár 7: Turizmu Azul

- Turizmu Kosteiru
- Turizmu Marítimu ou Náutiku
- Turizmu Natureza

Pilár 8: Explorasaun Rekursus Vivus (ka, moris)

- Peskas no Akikultura
- Bioteknolojia Mariña

Pilár 9: Explorasaun Rekursus Naun Vivus (ka,maten) ho Produsaun Enerjia

- Produsaun Idrokarbonetus
- Enerjias Renováveis
- Produsaun Masin
- Minersaun
- Desalinizasaun

Pilár 10: Transportes Marítimos no Desenvolvimento Portuário ho Lojístiku

- Infraestruturas
- Desenvolvimento Portuário ho Lojístiku
- Transportes Marítimos no Navegasaun
- Konstrusaun no Reparasaun Navál

Pilár 11: Seguransa Marítima

- Kapasitasaun, Vijilánsia ho Fiskalizaun
- Monitorizaun no Kooperasaun Internasionál

EIXU 4: APOIA IMPLEMENTASAUN EKONOMIA AZÚL (PILARES TRANSVERSAIS)

Pilár 12: Água (ka, Bee) no Saneamentu Báziku

Dezenvolvimentu ekonomia azúl depende, barak liu, ba saneamentu báziku adekuaudu ne'ebé garante katak águas kosteiras (bee iha tasi ninin) ho iha rai laran labele sai kontaminadas (katak, hetan baktérias) tanba rezíduus ho bee fo'er sira ne'ebé mai husi sistemas esgotus.

Nune'e, konsersaun ekosistemas mariñus no akuátikus, ho sira-nia espésies no biodiversidade, depende ba tratamentu adekuaudu ba águas reziduais ho jestaun eficiente ba rezíduus sólíduus (ka, lixu maran), atu nune'e sira la bele afeta sustentabilidade ekosistema fundamentál barabarak, husi mangais, ba *habitats* iha áreas tranzisaun, to'o ba resifes korál, nst.

Tanba ne'e mak ita bele dehan katak la eziste ekonomia azúl se la iha saneamentu báziku ne'ebé adekuaudu, inklui tratamentu ho protesaun rekursus ídrikus (ka, bee) nasionais.

Hanesan rezumu, saneamentu báziku ho ekonomia azúl interligadus (katak iha ligasaun ba malu). Sistema saneamentu eficiente esensial tebes atu garante protesaun ho sustentabilidade rekursus ídrikus, ne'ebé, fundamentál mós ba desenvolvimento ekonómiku comunidade sira ne'ebé depende ba rekursu hirak-ne'e.

Pilár 13: Jestaun ho Konsersaun Zonas Úmidas no Tranzisaun

Ekonomia azúl hanesan abordajen olístika ida no interdependente ne'ebé interliga ekosistemas terrestres ho mariñus. Ne'e signifika katak, atu promove desenvolvimento ne'ebé realmente sustentável no armoniozu iha país tomak, presiza artikula atividades iha área sira iha rai laran, inklui zona foho sira, tanba sira afeta saúde oseanu no vise-versa (katak, oseanu mós afeta sira-nia saúde).

Governu konsidera katak perspetiva ne'ebé integrada iha jestaun ho konservasaun zonas úmidas no tranzisaun bele lori ba mellores prátikas iha jestaun ho konservasaun ambientál, ne'ebé benefisia comunidade lokál sira hotu.

Nune'e, Governu sei konsidera:

- Basias idrográfikas (ka, mota-ulun) ho siklus ídrikus: konsidera katak bee ne'ebé suli husi foho ho mota sira ba tasi mak kondisiona saúde ekosistemas mariñus. Tanba ne'e, jestaun sustentável rekursus ídrikus ho konservasaun basias idrográfikas, iha area foho leet ho mota sira, ne'e krusiál hodi garante qualidade bee ne'ebé suli ba tasi. Aleinde ne'e, degradasaun (ka, destruisaun) basias idrográfikas kontribui ba poluisaun no lakon biodiversidade.
- Atividades ekonómikas no doméstikas: hahú husi prátikas agrícolas, florestais no industriais iha áreas foho no besik motaibun, no mós poluisaun ho má jestaun rezíduus sólidos, hanesan plástiku, ho sedimentus (katak, fo'er ho rai-henek) husi zona erozaun sira ne'ebé tama hotu iha mota ho bee sira iha rai-okos.
- Asoens protesaun ho limpeza zonas úmidas ho áreas kosteiras no tranzisaun, ne'ebé depende ba prátikas sustentáveis iha área terrestre (rai-laran), hodi evita durante períodus udan boot, bee lori rezíduu sira tama hotu iha tasi.
- Mitigasaun ho adaptasaun ba alterasoens klimátikas.

Dezenvolvimentu sustentável liuhusi ekonomia azúl tenke inklui promosaun prátikas sustentáveis iha kadeia tomak, no iha mota dalan sira hotu, husi bee-matan/mota-ulun to'o hasoru tasi, katak, husi foho ho bee sira iha ra-laran to'o iha zonas kosteiras, tranzisaun no oseau.

Pilár 14: Dezenvolvimentu Rural, Komérsiu no Indústría

Ekonomia azúl, hanesan temi ona dala barak, refere ba modelu ekonómiku ida ne'ebé valoriza utilizasaun sustentável rekursus mariñus, ne'ebé promove kreximentu ekonómiku, inkluzauun sosiál ho prezervasaun ekosistemas mariñus.

Estratéjia dezenvolvimentu ekonómiku ida-ne'e bele hanesan aliada poderoza (ka, kbiit-boot) ida iha dezenvolvimentu rural, liuliu iha rejiaun sira ne'ebé rekursus mariñus hanesan parte fundamentál ida iha ema nia moris no ekonomia lokál. Atividade sira hanesan peska sustentável, akikultura, turizmu mariñu ho explorasaun rekursus mariñus bele kria

empregus no jera renda ba comunidade rurál sira, ne'ebé halo parte maioria populaasaun timor.

Iha dupla perspetiva kona-ba sustentabilidade ho desenvolvimentu rurál ne'e, ekonomia azúl oferese alternativas ba agrikultura tradisionál, permite comunidade sira diversifika sira-nia fontes renda (ka, rendimentu) no redúz dependénsia ba atividade ida de'it.

Husi sorin seluk, desenvolvimentu atividade sira ne'ebé liga ho ekonomia azúl bele insentiva investmentus iha infraestruturas hanesan portus, estradas ho servisu transporte, ne'ebé la benefisia de'it explorasaun rekursus mariñus, maibé hadi'a asesu ba merkadus ho servisu ba comunidade rurál sira.

Kriasaun kooperativa ho indústría sira no fomentu komérsiu dezempeña papéis krusiais iha kontextu ne'e, liuliu husi pontu vista envolvimentu setór privadu ho kriasaun empregu, ne'ebé fundamentais ba diversifikasaun ekonómika, iha área sira hanesan peska ho kultivu mariñu, no mós indústría sira seluk hanesan turizmu mariñu ho indústrias conserveiras, enerjia renovável, bioteknolojia mariña, entre oportunidade sira seluk ne'ebé jera empregu ho oportunidades negósiu, hodi promove desenvolvimentu ekonómiku lokál.

Indústría ekonomia azúl impulsiona peskiza ho desenvolvimentu tekonojias foun ba explorasaun ho uzu sustentável rekursus mariñus. Ne'e inklui inovasoens iha bioteknolojia, tekonojias monitorizasaun ambientál ho métodos produsaun sustentável, hodi potencia (ka, hakbiit) komérsiu iha produsu mai husi tasi, hanesan peskadu, algas, biokombustíveis ho produsu farmaseutikus, ne'ebé bele komersializa globalmente. Komérsiu internasionál bele lori reseitas boot ba paíz kosteiru sira, aleinde promove troka koñesimentus ho mellores práttikas.

Atu ida ne'e sai hanesan estrátjia ida ho susesu, presiza iha estrátjias koordinadas kona-ba desenvolvimentu iha nível infraestruturas kosteiras no portuárias, ne'ebé bele facilita transporte ho lojístika, maibé la prejudika inisiativa sira ne'ebé promove konsersasaun ho protesasaun ambientál.

Hanesan rezumu, komérsiu ho indústría fundamentais tebes ba desenvolvimentu ekonomia azúl, tanba la kontribi de'it ba kreximentu ekonómiku, maibé promove mós sustentabilidade ho konsersasaun rekursus mariñus. Integrasaun práttikas sustentáveis iha atividade hirak-ne'e esensial tebes atu garante katak oseanu kontinua hanesan fonte rikeza ho bein-estár ba jerasoens futuras.

Pilár 15: Konta Satélite Tasi

Kriasaun Konta Satélite Tasi fundamentál atu sukat expresaun ekonomia azúl iha ekonomia nasionál Timor-Leste no iha kriasaun empregu, no mós ba verifikasaun kumprimentu objetivus kuantifikáveis ne'ebé Governu estabese ona ba domíniu setoriál sira seluk.

Esensiál katak Konta Satélite Tasi ne'e hanesan instrumentu estatístiku ida ba kompilasaun dadus ho análise, ne'ebé obedese ba konseitus kontabilístikus adekuadus liu no elabora tuir melhores prátikas kontabilístikas.

Governu sei aprova Rezolusaun ida husi Konsellu Ministrus ne'ebé sei sai hanesan Konta Satélite Tasi nian, ne'ebé kabe ba Institutu Nasionál Estatístika Timor-Leste kona-ba preparasaun instrumentu estatístiku importante ida-ne'e, no atua ho kolaborasaun hosi órgauns no servisu husi áreas setoriais relevantes seluk.

Konta Satélite Tasi ne'e sei publika tinan tolu dala ida, laiha prejuízu ba kompilasaun anuál dadu sira ne'ebé permite halo akompañamentu besik liu ba evolusaun estatístika ekonomia azúl.

Estratéjia ne'e sei permite sukat atividades ekonómikas bazeia iha tasi, ba fins inovasaun ho desenvolvimentu estratéjias. Nune'e, Governu konsidera katak fundamentál avalia produsaun bruta, valór akrentadu ho empregu ekonomia azúl relasiona ho ekonomia nasionál, hodi sukat nia kontribuisaun globál.

Atualmente, Timor-Leste la iha dadus detalladus nesesáriu hodi dezagrega indikadores espesífikus husi atividades ekonomia azúl ho nia kontribuisoens ba produsaun nasionál, ne'e mak Governu hakarak aborda kestaun ne'e ho forma graduál (ka, neineik).

Pilár 16: Instrumentus Planeamentu, Finansiamentu no Monitorizasaun

Planeamentu, finansiamentu ho monitorizasaun Polítika ho Planu Asaun kona-ba Promosaun Ekonomia Tasi ne'ebé Reziliente no Sustentável iha Timor-Leste, sei nesesita kalendarizasaun rasik, ho nia planu asaun ne'ebé define prioridades ho ida-idak nia medidas ba kurtu, médiu no longu prazu, ne'e mós ba konveniénsia (ka, vantajen) ba investmentus nesesáriu ho nia konstranjimentus orsamentais husi despesa públika.

Tanba ne'e, no la prejudika programa ho projetu sira ne'ebé atu dezenvolve ho Parseirus Dezenvolvimentu Timor-Leste nian no projetus husi iniciativa privada, ou setór privadu, no mós ONG's lokais no internasionais, presiza hili prioridades ba dezenvolvimentu ekonomia azúl iha lejislatura ida-ne'e ho nia fontes finansiamentu.

Efikásia ho sustentabilidade husi implementasaun Polítika kona-ba Ekonomia Azúl obriga adota konjuntu medidas estruturais ho operasionais ne'ebé bele asegura artikulasaun institusionál, apropriasaun komunitária ho kapasitasaun téknika husi diferentes atores envolvidos. Ne'a atu asegura katak ambisaun polítika bele tradúz iha impaktu réal no ba tempu naruk, ne'ebé harii-metin ho modelu governasaun ida ne'ebé efikáz ho inkluzivu.

Nune'e, análise preliminar ida kona-ba panorama atuál finansiamentu ekonomia azúl iha Timor-Leste, identifika rekursus públikus nasionais, assisténsia husi parseirus dezenvolvimentu ho investmentus husi sektór privadu, no avalia to'o ona iha ne'ebé fluxu hirak-ne'e sentra atualmente iha ekonomia azúl, ou ne'ebé bele redireciona ba ekonomia azúl liuhusi negosiasiens bilaterais, rejionais no internasionais.

Nune'e, ba dahuluk, nesesáriu komunika prioridades Governu nian, la'ós de'it ba alinhamentu ne'ebé boot liu ho Parseirus Dezenvolvimentu, maibé kompreensaun ne'ebé di'ak liu husi parte investidór sira kona-ba oportunidades ne'ebé merkadu timor apresenta, atu nune'e hamenus tiha persesaun kona-ba risku husi investmentu ho eventual persesaun kona-ba apoiu insuficiente ho kompromisu husi parte setór públiku.

Husi parte prokura, iha lakunas kona-ba koñesimentu, kapasidade ho konxensializasaun relaciona ho oportunidades negósiu no investmentu ne'ebé liga ho ekonomia azúl. Governu, liuhusi nia polítika ho planu asaun, hakarak kolmata (ka, preenxe) lakuna hirak-ne'e, hodi define nia prioridades atu kanaliza opsoens ba projetus "finansiáveis" (katak, bele finansia) ho medidas apoiu, ka subsídus ne'ebé sei define, hanesan redusoens iha taxas impostu, iha setór sira hanesan eletrisidade, rendas, no seluk tan ne'ebé sei define mós, atu nune'e setór públiku bele sai hanesan parseiru efetivu ida iha finansiamentu atividades ne'ebé atu dezenvolve iha país.

Ekonomia azúl hakarak mós sai hanesan insentivu ida tan ba dezenvolvimentu sektór privadu nasionál, ne'ebé sei subdezenvolidu maka'as tebes. Husi parte seluk, Governu fiar metin katak liuhusi nia objetivus estratéjikus kona-ba ekonomia azúl sei bele kapta investmentu diretu estrangeiru ne'ebé boot liu, ho benefísius ba interveniente sira hotu, no konsekuénsias diretas iha melloria kondisoens moris timoroan tomak nian.

Planu Asaun Ekonomia Azúl

Planu Asaun ne'e hakarak estabeselese objetivus estratéjikus, medidas ho asoens ba tinan sanulu oinmai, hodi nomeia entidades governamentais responsáveis ba ninia implementasaun, halo artikulasaun ho sira-nia parseirus, inklui kalendarizasaun ba ida-ne'e ho prinsipais indikadores no rezultadus.

Nune'e, parte final "Polítika ho Planu Asaun kona-ba Promosaun Ekonomia Tasi ne'ebé Reziliente no Sustentável iha Timor-Leste" bele rezume iha tabela ida ne'ebé hakarak estabeselese roteiru implementasaun ida ba desenvolvimentu sustentável nasional,ne'ebé sei konsidera iha planus anuais ministérius ho ajénsias governamentais ho sira ida-idak nia planus finansiametu, monitorizasaun no avaliaasaun – kondisoens fundamentais la'ós de'it ba implementasaun kuadru estratéjiku ekonomia azúl, maibé mós ho esensial akompañamentu husi Sociedade Sivil ho validasaun rasik nu'udar Estadu-de-direitu demokrátiku.





Gabinete Fronteiras Terrestres no Marítimas
República Demokrátika Timor-Leste

©2026